

ԻՆՔՆԱՐԱՐՈՒՄՆ ԻԲՐԵՎ ՈՒՂԻ, ՃԱՆԱՊԱՐՀ ԻՆՏՐԱՅԻ «ՆԵՐԱՇԽԱՐՀ»-ՈՒՄ

Ինտրայի «Ներաշխարհը» (1906) ընթերցողին Արիադնեի թել է տալիս՝ մտնելու հոգու լաբիրինթոս։ «Ներաշխարհի» վերաբերյալ Ստ. Թովչյանը նկատել է. «Եթե փորձենք սահմանել ժանրը, ապա կատացվի՝ փիլիսոփայական-լիրիկական արձակ պոեմ»¹։ Պետք է մի փոքր ուղղում մտցնել. «Ներաշխարհը» ոչ թե «փիլիսոփայական-լիրիկական արձակ պոեմ» է, այլ՝ լիրիկական-փիլիսոփայական, քանի որ այստեղ համակարգված չէ որևէ փիլիսոփայական տեսություն։ Փիլիսոփայությունն Ինտրայի ներաշխարհի հենքի թելերի ամբողջությունն է, որի լիրիկական գունավորմամբ ընթերցողին է մատուցվում հոգու շերտերի ինքնազննումը, ես եկակետից Անսահմանություն վերջնակետի միտվածությունը։ «Ներաշխարհը» կյանքի և մահվան հակադրամիասնության երգ է, մահվան ցավից պատրանք-երազանքներում սփռվելու, սիրո մեջ մոռացում փնտրելու երգ, բանական մարդու՝ *homo sapiens*-ի ներաշխարհի էսսե՝ *Ecce Homo*։ «Ներաշխարհը» լիրիկական-փիլիսոփայական էսսե է։

Այն բացվում է բանական մարդու՝ մառձող մարդու ինքնազննման նախապատրաստությամբ։ «Ներաշխարհի» առաջին իսկ էջերից սկսում է ձևավորվել Ինտրա-գրողի կերպարը։ Նրա ես-ի բացահայտմամբ աստիճանաբար կազմավորվում է մարդու հատուկ մի տեսակի բնութագիրը։ Ո՞վ է մարդու այդ տիպը, ի՞նչն է բնորոշ այդպիսիներին։

Նախ՝ նրանք անհատականություններ են՝ «հասարակ կենցաղեն տառապող», դրանից բարձր կանգնած։ Նրանք մեծ երագողներն են և մեծ տառապողները, նրանք ցավից գեղաստունացողներն են։ Հայտնի է, որ մարդը՝ որպես կենսաբանական տեսակ, չի առաջադիմում. նա հավերժորեն նույնն է։ Քաղաքակրթությունների հերթափոխներում միշտ էլ եղել են մարդ-տեսակի բացառություններ՝ բարձրագույն տիպի էություններ, որոնք ծնունդ են տվել արվեստի, գիտության, սակայն բարձրագույն տիպը կենսաբանական տեսակ չի դարձել առ այսօր²։ Հակադրվելով դարվինիզմին՝ այս երևույթի մասին հանգամանալից խոսվում է նաև Ֆ. Նիցշեի «Կամք առ իշխանություն» աշխատության մեջ³։ Խոսքը անհատականության, ինդիվիդուալի մասին է, որին միշտ հակադրված է իր ժամանակի «ամբողջը»։ «Ներաշխարհում» Ինտրան այն կարծիքին է, թե մարդու բարձրագույն այդ տիպը կարծես տեսակի է վերածվում՝ նկատի ունենալով այդպիսի անհատականությունների «շարանը»՝ դարերի կտրվածքով. «...կարծես տեսակացող անհատին կյանքի եղանակն է առանձնությունը»⁴։ Խոսքը ինտրովերտ խառնվածքի մասին է, որը բնածին ներհայաց է, ինքնազն-

նող, հակված առանձնության, մենության: Սա նույն անհատն է, որի մասին Չարենցը խոսում է՝ որպես հզոր կաղնու՝ շրջապատված մացառներով: Սա նույն անհատն է, որի կերպարը խոր արմատներ ունի համաշխարհային գրականության մեջ՝ հնդկական ու պամիլադների ներհայեցող որոնող, Պյութագորի առասպելական կերպար, իրանական Ավեստայի ավետաբեր Ջարդուշտ-Ջրադաշտ, Բրիստոս, Բուդդա, ամսիկ և միջնադարյան միստիկներ... Իսկ նորօրյա կտրվածքով՝ դրանք այն անհատականություններն են, ովքեր արարում են արվեստ, մշակույթ...

Ինտրայի «Ներաշխարհի» հերոսը՝ բացառիկ հոգին, գիշերվա անեզրության մեջ ներանձնանում է՝ խորհելու Անահիմանի, «արտաշխարհի», «գերաշխարհի» մասին, որի մասնիկն է իր իսկ հոգին: Ինտրան մեջբերում է Նիցշեից, թե այդ հոգիները «ուժերու կուտակում մ'են» (էջ 58): Նրանք ձգտում են առանձնության, ուր պահպանվում է նրանց եզակիությունը, հոգու ներդաշնակությունը, ուր հզոր կենտրոնացմամբ դառնում են ամենաարտադրողական, ամենաբեղմնավոր անձինք: Ինքնապատերազմող հոգու ներքին տառապանքով նրանք «ծնում» են լույս: Նման անհատականությունների մասին Նիցշեն գրում է. «Ո՞վ կհամարձակվի նայել հոգեկան դառն ու սարսափելի տառապանքների անապատը, ուր ընկղմվել են բոլոր ժամանակների ամենաբեղմնավոր մարդիկ»: Ի թիվս այլոց՝ Ինտրան թվարկում է նման բացառիկ անձանց, ովքեր դարերի պատմությունից հառնում են իրենց՝ մեմակյացի ճգնարաններից՝ «Սաքիսմունիին անապատականությանը. Մովսեսին լեռնակեցության մեջ. Մեռյալ Օովուն եզերքներուն վրա թառած Նասեյանց առաքինի մախաբիստոնեության մեջ. անըմբռնելի մեկուսացումներուն մեջ...» (էջ 58) և ավելացնում, թե առանձնության մեջ այդպիսի անհատների գերհասունացումն այլ բան չէ, քան «զարգացումը մարդու բոլոր կարելիությանց» (էջ 59): «Ներաշխարհն իր հեղինակեն ղիտված» հոդվածում Ինտրան ինքն իր մասին գրում է. «...Ինտրա բոլորովին դեմիանդիսմանական (intuitif) իմացականություն մ'է» (էջ 329). բազմակողմանի զարգացած այս անհատականությունը, որն օժտված էր երկնատուր շնորհով, պատկանում էր ինտրովերտ-ինտուիտիվ խառնվածքի, որի մասին ինքն էլ էր տեղյակ: Իսկ սա մարդու այն առանձնահատուկ տիպն է, որոնք վերուստ մարգարեներ են ծնվում⁶: Իզուր չեն Ինտրայի և Նարեկացու միջև աղերսներ տեսել:

Ներքնատեսությամբ, ինտուիցիայով Ինտրան ճիշտ է կռահում առանձնության բերած հետևանքները ինտրովերտ-ինտուիտիվ խառնվածքի դեպքում: Նա ցույց է տալիս ինչ-որ բուն երևույթի հետևանքը. առանձնացումը բերում է հոգևոր ահռելի հասունացում՝ հոգեբանական «բարձր լեռներ», որի կատարից նման անձինք ի վիճակի են հանգելու բարձրագույն բարոյականության՝ բարու և չարի նոր ընթոնման պահանջի:

Այս հետևանքները կարողությունների խտացման մի մասն են կազմում միայն, իսկ հոգևոր մտան *գերհասունացման պատճառը սուրբիմացիան է*։ այսինքն՝ առանձնացումը՝ ճգնակեցությունը՝ մենակեցությունը, հանգեցնում է սուրբիմացիայի։ Ահա այսպիսի ներանձնացման մասին է խոսում Ինտրան «Ներաշխարհի» առաջին գլխում («Ներաշխարհը» գլուխների բաժանված չէ, բայց ուշադիր ընթերցողը կնկատի, որ գիրքը բաղկացած է ութ գլխից, որոնք իրենց հերթին կազմված են մանր հատվածներից) և երազում մտան առանձնացման հնարավորություն. «Ո՛վ պիտի տար ինձի, բարե՛, խրճիք մը, Սև Ծովուն մեկ վայրենի ափունքին վրա մեկ խրճիք մը, ուր ես բնակեի, ուր խիղճս բնակեր...» (էջ 59)։ Ուշադրություն դարձնենք մի հանգամանքի վրա. ինքնագնման, ներանձնացման, մենակեցության կամ ճգնակեցության ֆենոմենը, որ գալիս է դարերի խորքից՝ իբրև կրոնական երևույթ, զանազան դիվերգենցիաներով (ճյուղավորում) այնքան հաճախ է դրսևորվում 19-րդ դարավերջի և 20-րդ դարասկզբի եվրոպական, մասնավորապես գրականության մեջ։ Մի՞թե մույն երևույթը չէ և՛ «հոգու աշտարակում» փակվելը, և՛ «գրքերի մեջ» նետվելու հոգեբանությունը, և «հիսխուստը» դեպի «բարձր լեռներ»։

Հայ գրականության մեջ «սփռված» օրվա պահեր խորհրդանշող սիմվոլները, դիոնիսյան և ապոլոնյան մախասկիզը, «հեթանոսականությունը» և այլն, և այլն և հատկապես «ճգնակեցության», «ինքնասուզումի» «վարակի» աղբյուրը սիմվոլիզմն է, որը հազեցած էր «կյանքի փիլիսոփայությանմբ»։ Նիցշեի «Այսպես խոսեց Զրադաշտը» այլաբանական աշխատության գլխավոր հերոսը՝ իմաստուն մենակյացը, որ հաճախ է «մենություն քաշվում» և «հոգու ամենալուռ ժամ» ունենում, շատերի, մասնավորապես «Ներաշխարհի» հերոսի հոգու երկվորյակն է։ «Ներաշխարհի» առաջին գլխում Ինտրայի հերոսը, ինչպես արդեն նշեցինք, երազում է առանձնություն՝ Սև ծովի ափին և զանազան հարցեր է շոշափում, որոնք ուղիղ կամ անուղղակի առնչվում են մենակյացության, առանձնության ֆենոմենին։

Առանձնանալու, մենանալու բնատուր հակվածությամբ հոգին՝ խորհող, բանական ես-ը, որ միտում է իր ինքնության և Տիեզերքի անսահմանության հետ առնչության բացահայտման, կարող է գրել. «Սև Ծովուն աղի հոծությունն իմ գերաճումս տրամադրեց։ Կյանքը, զոր հուզվեցա այն օրերեն ի վեր՝ բխեցավ այն Ծովուն մոռալեն և այն աղջկանը լուսեն» (էջ 54)։ Պետք է եզրակացնել, թե ես-ի գերաճը, ըստ Ինտրայի, ևս պայմանավորվում է ցավով և սիրով։ «Ներաշխարհի» առաջին գլուխը առ կինը՝ Իռենան, եթերային, ավելի հոգևոր, քան մարմնական սիրո փառաբանում է՝ մասնավորապես սիրո բարձրագույն դրսևորում՝ սեր առ Անեզը, սեր առ Լույսը, սեր առ Աստված։ «Ներաշխարհի» ես-ը ևս այն խառնվածքներից է, ում կյանքում սերն իր ուժգնությամբ համագործակցում է մահվան։ Եթե կա այդ սերը, կյանքն իմաստավորված է, իսկ եթե չկա, կյանքը վերածվում է մեծագույն

անիմաստության, անհեթեթության, ողբերգության: Այդ ես-ը մարդու՝ խոր սիրող և տառապող տեսակն է: Ներհայեցող էությանը մա ներըմբռնում է, որ ինքը ևս այն միատիկներից է, որոնք մարդկության դարավոր պատմության երկնակամարում ժամանակ առ ժամանակ փայլել են որպես վառ ու պայծառ մենավոր աստղ և լուծվել, միախլուսվել Տիեզերքին: Բայց այդ բացառիկ հոգիները ևս, իբրև սովորական մի մահկանացու, կաղապարված, բանտված են մարդկային մտղեն ձևի մեջ, իսկ հոգին սիրելու անսահման կարոտ ունի. «Ու՛ր ես, Իռե՛նա» (էջ 38): Քանզի կա՝ Իռե՛նան: Քանզի անսահման զգացում կա նրա համդեպ: «Ներաշխարհի» հերոսն իր հոգում նրան օծել է ամենաշիրաշալի, ամենալուսավոր երանգներով: Գուցե հնարել է հենց տեղյանական այն սուտը, որի թմբիրում օրորվում է սիրող հոգին:

Այդպիսի հոգիները երկնում են երազանքներ, որոնցով իմաստավորվում է կյանքը: Երազանքը բնորոշ է «ուժգին ինքնությանը», որը չի կարող համակերպվել իրականության հետ, և ինքն է բերում նոր օրենքներ, նոր բարոյականություն: Սև ծովի (կյանքի սիմվոլը) մոայլից է բխում երազանքը, որի բարձրակետն է սերը: Սև ծովի սարսաղազուռ նկարագրից բխում է մարդկային կյանքի կառքի «սարսափահար թավալումը» դեպի երազանք և սեր: Ու՛ր փախչել իրականության ցավից: Ինչպիսի՞ն պիտի լինի այն իրականությունը, որտեղ նորմալ հարաբերություններ կկարգավորվեն: «Ներաշխարհի» ես-ը՝ իբրև ներանձնացող իմաստուն, հանրության, հասարակության ներսում գործող իրավունքն ու պարտականությունն ընկալում է այսպես. «Իմ տանջանքս է ընկերությունը, ցորչափ ստորացնող զիջողություններ կենթադրեմ, - իրավունքներու խոլ վաճառումներ՝ ապուշ պարտականությանց փոխարեն <...> Ավելի կամ նվազ կորսված անձնականություն մ'է ամեն անհատ» (էջ 55), որը հիշեցնում է Նիցշեի միտքը. «Մեր պարտականությունները՝ ուրիշների իրավունքը մեզ վրա»⁶: Նիցշեն առանձնացնում է միայնության հակում ունեցող օրենսդիրներին մասսաներից, ամբոխից, քանզի ամբոխը իշխող դասի ձեռքին դառնում է «ամենօրյա գործածության առարկա»⁷: «Ներաշխարհի» առաջին գլխում ես-ը գլոբալ մտածողությանը ինքնազննումից Անեզրության միտող մեկության հակված այն անհատն է, որը քաղաքակրթությունների զարգացմանը զուգահեռ ներփակ է դառնում՝ առանձնության մեջ զտնելով ներքին ազատություն: Չմոռանա՞նք, որ նրանք բերում են բարու և չարի նոր ըմբռնում՝ լինելով օրենսդիրներ: Հետևապես՝ պետք է ենթադրել, որ «Ներաշխարհի» հաջորդ էջերում ներհայեցող իմաստուն-խենթը պետք է փրկության ուղի, դուռ, ճանապարհ, ելք «երկնի»:

«Ներաշխարհի» *երկրորդ* գլխում տրամադրությունը կտրուկ փոխվում է: Եթե առաջինում էական էին Սև ծովը, պատուհանից երևացող մոճիները, որոնք երկրայինից երկնայինին փոխանցումն իրականացնող

սիմվոլներ էին, ապա երկրորդ գլխում նոր սիմվոլ է հայտնվում՝ *անձրևը*, որը խորհրդանշում է անձրև-հոգեվիճակը: Միապաղաղ անձրևը զուգորդվում է վշտերի համր ու լինի լացի, անհուն թախծի, արթնացած ցավերի, սպասվող մահվան հետ. այս ամենը կարծես բխում է «աշխարհքին վրա իջած ըլլա մոռալամած ճշմարտութենե մը» (էջ 60): «Ներաշխարհի» երկրորդ գլխի առաջին մասում ներհայեցող հոգին բզկտվում է կասկածից, երկփեղկվում: Երկփեղկումը, ներքին ինքնապատերազմը կամ, ինչպես Ինտրան է բնորոշում, «անվանելի ինքներկբայումը» հետևանք է *խնացության, խոր ինացության*, որի մեկ այլ սիմվոլ-խորհրդանիշն էլ «բարձր լեռներն» են: Այսինքն՝ ինացությունը հանգեցնում է կասկածի, տառապանքի... Նույն՝ Ժողովողի իմաստությունը... Ըստ Ինտրայի՝ այս հոգեբանությունն առաջ է գալիս գծում առօրյայից, ուր շուրջը միայն անժպիտ, առանց երկինք հոգիներ են, աներազ հոգիներ, թշվառություն: Ամենուր գոյության կռիվ է, ըստ Ինտրայի՝ «կենսապայքար»: Ապրողները՝ կարճ մտածողությամբ, «դրապաշտ կենսագրավման մը» գաղափարով են տոգորված: Նրանք չեն գիտակցում ամենաահավորը. անջրպետից բոլորին է նայում «նողկալի, ահաբեկիչ մահկանացիությունը»: Իրականությունը սուկ թվացյալություն է, կեղծիք, շուրջը՝ միայն սուտ, ծանծաղություն, հիվանդագին անշարժություն, «բարձր լեռներից» անկում դեպի քաղաքների խեղդող, հեղձուցիչ օդը: Միա ևս մի հարց. համատարած հակասականության և կեղծիքի մեջ քարոզվում է հավասարություն: Բայց սա ինդիվիդուալի, անհատականության մահ է, «ամբոխի», «հոտային բնագոյների» գերիշխանություն: «Կենսապայքար»-գոյության կռիվն սպանում է ներքին ազատությունը: Նման հասարակական պայմաններում է, ըստ Ինտրայի, ծնվում հոռետեսությունը: Նքե հասարակական հարաբերությունները կարգավորվեին, չէին լինի մեծ հոռետեսները: Շուրջնհատերյան նման հոռետեսությունից բխում է «ամեն բանի վիշտը». «...ընդհանուր վիշտ մը կզգամ՝ *ամեն բանի վիշտը*» (էջ 64):

Բանի որ «անձրևի մոխրագույն ստվերն» է իջել ամենուր՝ շուրջը լցնելով տիեզերական վիշտ (այս պատկերավորությունն ընկալենք փոխաբերաբար՝ վերագրելով ներաշխարհին՝ մարդկային հոգուն), Ինտրան առաջադրում է նոր բարոյականություն՝ բարու և չարի նոր ըմբռնում, որը հնարավորություն կընձեռի դուրս գալ անհույս հոռետեսությունից և մահվանը փարելու երազանքից: Մարդը պետք է բնության դեմ պայքարի, այնինչ «անդու կռիվը... կզինվի մարդկային անհատներու, խումբերու միջև» (էջ 68), այնինչ կեղծ, ցուցադրական քարոզվում են սիրո գաղափարներ. կենսապայքարը մարդկանց միջև մարդկության խայտառկությունն է, մրցում պետք է ծավալվի «անհատականության ամենամեծ գործնականացման» համար, այնինչ համատարած «աճում» են միմյանց պատճենահանող, կրկնող արարածներ: Անհատի բարոյական կատարելության

ձգտումը նեղ, սահմանափակ խնդիր չէ, «անհատական բարոյական» մոյճ «հավաքական բարոյական» է, հետևաբար ամեն բան պետք է սկսել մարդկային հոգուց՝ մեծ վերափոխություններ կատարելով այնտեղ:

Ներաշխարհի» երկրորդ գլխում հոռետեսությունը հանգեցնում է մահվան երազանքի, սակայն ներքին ես-ը կտրուկ ընթրստանում է՝ ցավից վերածնվելով և վերադառնալով իրականության՝ հարություն առնելով և բերելով «դուռ», «տղի», «գույս»: Երկրորդ գլխի երկրորդ մասը լույսի, սիրո, Անեզրի, Տիեզերքի փառաբանություն է: «Ժնչպե՛ս ամեն բան գեղեցիկ է տառապանքեն ետքը» (էջ 73): Ինտրայի «Ներաշխարհում» ծավալվում է ոսկի հեքիաթ, որի առանցքը դառնում է ոգեղեն սերն առ Իռենան, առ բնությունը, առ Անեզրը՝ տիեզերականը:

Վեդայական տիեզերական գնծությունը՝ լույսի, բույրերի, գույների, բարության, երջանկության ծփանքը շարունակվում է ծավալվել նաև Ինտրայի «Ներաշխարհի» հաջորդ՝ *երրորդ* գլխում, ուր այժմ երջանկությունն ընտրում է արբշխ գնծության նոր տարածք՝ գինևտուն, որտեղ բաժակի «այրուխն բռնկած» «լույսերը կծփծփան»: Ներաշխարհում դիոնիսյան անգուսպ գնծություն է, հաճախի զագաթնակետ, երբ... հոգին լուծվում է Անհունի անեզրության մեջ. «...միթե Անհունը չէ՞ այն անպատում ու նշույող համադրույթը, որուն կտարվին էսվին» (էջ 89), երբ հոգին անցնում է իր էության սահմանները՝ խառնվելով Հավերժությանը:

Ինտրայի «Ներաշխարհի» ես-ը ևս ապրում է տիեզերական գնծություն, հեթանոսապաշտ հոգեբանությամբ՝ մարդ-աստված միության ներդաշնակության հրճվումը, նա ևս թագուրյան բնապաշտությամբ սեփական երակներում զգում է տիեզերքի հավերժական տրտիլը, օլկիանի շնչառությունը, ծառ ու ծաղկի զվարթ ազմուկը: «Ներաշխարհում» այս ամենը՝ հոգու հրճվանքի տիեզերական ծփանքը՝ մարդու հոգում դիոնիսյան միտվածությամբ կիսաքմբիթի, վեդայական իմաստանության թագուրյան վերաիմաստավորման՝ «ջիբուն-դեբուդի» թե հայ հեթանոսապաշտ արիական կեցության արյան կանչի հաղթանակը, ոչ այլ ինչ է, եթե ոչ «բարձր լեռներին» հոգեբանությամբ հասածի փախուստ իրականության ցավից, մահվան գիտակցումից դեպի երազանք-պատրանք, դեպի հոգու խաղաղություն և անդորր: Սակայն ներքին ես-ը նորից սթափ մայում է իր շուրջն ու գինետան մի անկյունում «քացահայտում» մի ծեղուկի, որ խոսում էր «Ներաշխարհի» հերոսի մեծած հոր մասին՝ ավելացնելով. «Լույսերու մեջ պառկի» (էջ 93): Բնապաշտ, հավերժապաշտ, տիեզերապաշտ ես-ը պեկոծվում է... մախամծից, քանգի այս մարդը բախտավոր է անգիտակից հավատով, «այս մարդը գերեզմանին դանդիղը կմոռնա՝ լուսեղեն ցնորքներու մեջ... Անդրագույն երանությունը կրնա՝ լույսը ըլլալ ուրեմն...» (էջ 93): Եվ տառապանքը, որ ծնվում է մարդու անցողիկության գիտակցումից, մահվան սթափ ներկայությունից, պիտի խեղդվի նորից: Եթե մինչ այս էջերն այն

մոռացության էր տրվում տիեզերական լույսի, հրճվանքի ծփանքում, այժմ մոռացության է տրվում գինու բաժակում: Գինով արքեմալը դառնում է ելակետ, որտեղից գինովցած հոգին նորից համայնական, տիեզերական ես-ի մեջ մարդու ինքնության ազատությունն է գտնում:

Այսինքն՝ հավերժական վերադարձի փիլիսոփայական պտույտը գործում է նաև մարդկային հոգում: «Ներաշխարհի» մինչ այժմ քննված հատվածները թույլ են տալիս եզրահանգելու, որ Ինտրայի «Ներաշխարհի» ես-ը ապոլոնյան և դիոնիսյան նախասկիզբների միասնությունն է. ներքին ինքնագնումից, ինքնապատերազմից մեռնելով և հարություն առնելով՝ այդ հոգին լցվում է ապոլոնյան լուսավառ ինքնախաբկանք-պատրանքով, երազով, իսկ մարմինն արքեցնելով «ալքոլով»՝ թմբիրի մեջ ձուլվում է տիեզերքին, բնությանը՝ որպես հավերժության մի հյուլ:

Չորրորդ գլխում բացահայտվում է ես-ի աստվածային մաքրության և տիեզերական հյուլեայնության գաղտնիքը: Մաքուր, լուսավոր ես-ը չի ապականվում իրերի աշխարհի արտացոլք պատկերներից: Նման հոգիները դրանով իսկ տիեզերական Հավերժի նույնությունն են կազմում: Հենց այս հյուլն էր՝ որպես երկրի վրա մարմնավորված մի մասնիկ, փառաբանում իր էության անսահմանությունը: Սրանով է Ինտրան բացատրում «աստվածների» միակությունն ու նույնականությունը՝ միաստվածությունը (ինչ էլ կոչվեն դրանք՝ Ձև, Օսիրիս, Բրահման...), իսկ ներանձնանալու հակում ունեցող, աշխարհիկն իր ներսում չարժևորող հոգին հենց Անսահմանի մասնիկն է: Ինտրան բացառիկ եզրահանգման է գալիս. նա փորձում է տալ հավատքի անհրաժեշտության գիտական բացատրությունը՝ ձևակերպելով այսպես. «Ա՛հ, կրոնքներուն նպատակն է, քրիստոնեության նպատակն է ընդհանրացնել զմարդ» (էջ 102): Մարդու ես-ը ձևավորված չէ, ինքնագիտակցմամբ մարդը ձգտում է ինքնահղկման, ինքնավերահսկման, ինքնակատարելագործման: «Ներաշխարհի» *հինգերորդ գլուխն* սկսվում է նիցչեական «Մանուկ է դարձել Ջրադաշտը» տողում ամփոփված հոգեբանության վերլուծությամբ:

Մանկական տարիքում շաբաթ երեկոները եկեղեցի գնալու և վաղվան՝ Կիրակիին՝ որպես տոն, տերունական օր, նախապատրաստվելը հոգեբանորեն բացատրվում է հասուն մարդու հետադարձ հայացքով՝ զարթնածի արժևորումով: Ծերությունը հակված է հոգեբանական ռեգրեսիայի՝ բարու և չարի իմացության բարձունքից հետ մղվելով դեպի սկիզբ՝ մանկություն՝ դրանով իսկ փարելով պատրանք-երազանքի: Ինտրան խոսում է երանության երկու վիճակի մասին՝ մանկան ազատության և ծեր մարդու հոգու խաղաղության, բայց ընդգծում է, թե ինքը «շատոնց կորսնցուցած» է իր ազատությունը, նաև հեռու է «խաղաղութենեն»: Այնուհետև պարզում է ասելիքը՝ բնութագրելով սեփական ներաշխարհը: Նա նշում է, որ դեռևս - հասուն տարիքում չէ (չմոռանա՛նք, որ «Ներաշխարհը» գրվել է մոտավո-

րապես քսան տարեկանում), բայց ներսն էլ մանկան անմեղություն չկա: Այնքան է հասուն, որ փորձում է արգելել ապականված արտաշխարհի («ներաշխարհի» հականիշ իմաստով) մուտքն իր հոգի, որ հոգին չադտոտվի, բայց և դեռ մեղավոր աշխարհն ու մարդուն ներելու և սիրելու չափ վճիռ չէ այդ հոգին: «Ներաշխարհի» հինգերորդ գլուխը, բացառիկ հոգեբանական խորություն ունի. նախորդ շարադրանքն ասես սրա նախապատրաստությունն էր, որում ամփոփվում է «Ներաշխարհի» բուն ասելիքը՝ մարմնականից անցում հոգևորին, սեփական հոգու բաղադրությունը գիտակցելով ինքնագիտակցմամբ և հզոր ինքնակառավարմամբ հանգում Քրիստոսին՝ Փրկչին՝ հավիտենական Լուսին: Ողջ հինգերորդ գլուխը «գիտակցության, ինքնաճանաչման զարհուրելի ու մահացու աճումով մը» (էջ 134) եկեղեցու ներսում թևածող աղոթքների ընկալում-վերլուծություն է, անգիտակից-անմեղ միամտությունից՝ կրոնական դիտանկյունից «երախա» հոգեբանական վիճակից, հոգևոր հասունացման՝ հոգու ավազանում *մկրտության* հասնելու պատմություն: Այսպես է մարդը մկրտվում Քրիստոսով, այսպես է մարդը վերածնվում, լցվում նոր լույսով: Ինքնըստինքյան հասկանալի է դառնում նաև եկեղեցում թաղի աղբեցող ծերունիներից մեկի հայացքում մեռած հարազատ հորը «հայտնաբերելը»: Հուշերը հետ են տանում. կենդանության օրոք հայրը չէր հանդիմանում, նայում էր լուռ, և դա ավելի ծանր էր: Իր սիրով տիեզերքը ողողած Աստված էլ նույն բարեգութ հայրն է, և աղոթքի բառերը՝ «Հայր գթած», նոր իմաստ են ձեռք բերում: «Ներաշխարհում» զուգորդումները վեր են հանում զանազան հոգեբանական իրավիճակներ, կատարվում են նոր բացահայտումներ: Իր թելադրանքով, պարտադրանքով Հայրն ինքը Օրենքն է. նա որդու մեջ սրբագրում է ինքն իրեն: Որդին հոր վերածնունդն է: Իրականության անհեթեթության ֆոնին էլ ավելի են արժևորվում աղոթքը, եկեղեցին՝ «թերևս ճշմարիտ բաները»: Գերիմաստնացած հոգին շարունակ կասկածանքի մեջ է. ուրեմն աղոթքն ու եկեղեցին ևս «թերևս ճշմարիտ բաներ» են. ճշմարտության փնտրատուքում տիեզերական անգոյության, անեության փառաբանումը ևս ցմռք ու պատրանք է՝ հոգու ցավը մեղմող ինքնօրորում՝ ի հեճուկս ամեն անկյունից նայող մահվան: Եվ ահա ես-ը նորից իր խցում է, իսկ սեղանի ծաղկամանից նրան է նայում թունավոր բույս բանգը՝ մահվան խորհրդանիշ ծաղիկը: Նորից մարդկային ներաշխարհի երկփեղկում, տառապանք, նորից՝ կողք կողքի կյանքը և մահը, մահը և սերը, պատրանք - երազանքը և մահը:

Կարծես «Ներաշխարհի» ես-ը կրկին ապրեց մահվան սթափ ներկայությունը: Հինգերորդ գլուխն ավարտվում է նոճիներին ուղղված ձոնով, նոճիներ, որոնք այս անգամ դառնում են ինքնասուզվող ներհայեցողի՝ դեպի խաղաղվածությունը հոգու վերալացման խորհրդանիշ: Այն դառնում է մահկանացության՝ դեպի «զուսանյութ Հավերժությունն» ունեցած ձգտման

խորհրդանիշ: Իբրև մեռած և վերածնված էակներ՝ նոճիները գիտեն Հանգստի աստղայի խաղաղությունը, որին մարդը հասնում է իր էության նյութը լուծելով տարածական նյութի մեջ: Ի դեպ՝ նոճին՝ կիպարիսը, որն այնուհետև գլխավոր սիմվոլ է դառնալու մահ Ինտրայի «Նոճաստան» ժողովածուում, հեղինակի կողմից պատահական չի ընտրված: Այն Աիդ եզերքի սրբազան ծամն է¹⁰, որն իր սկզբով դեպի երկնի անհունը հենց խորհրդանշում է երկրայինի և երկնայինի կապը, երկրային գոյությունից հոգու փոխանցումը անտեսանելի ոլորտ: Եվ «Ներաշխարհում», և՛ «Նոճաստանում» մահվան գաղափարը հանգիստ չի տալիս մերքին ես-ին: Իմաստուն հոգին որոնում է կյանքի իմաստը, մահվան խորհուրդը, փորձում ըմբռնել դրանք:

«Ներաշխարհի» *վեցերորդ գլխում* բանգ - մահը լայնորեն տարածում է թևերը՝ շուրջը սփռելով իր սառը ներկայությունը: Այդ սառը շնչից ես-ի ներաշխարհում զուգորդումներ են արթնանում՝ Եգիպտոս, բուրգերի հովիտ... Ինչպես բանգը, բուրգերը և Մֆինքսը ևս դառնում են մահվան խորհրդանիշ:

Ինքնասուզման հակված ես-ը ձգտում է հասկանալ բուրգերի, Մֆինքսի խորհուրդը: Նա ուզում է հավատալ, թե մահից հետո այլև ոչինչ չկա. այդ դեպքում ի՞նչ իմաստ ունի նյութական, իրերով լի աշխարհը: Չէ՞ որ այդ դեպքում «մտածումն ու կենցաղը» հակասում են իրար: Ինտրան հավատում է ձևերի հավերժական փոխակերպումներին, էներգիայի՝ մի ձևից մյուսին անցնելուն: Այստեղից էլ բխում է մարդու՝ մահվանը հաջորդող հարության նկատմամբ հավատը, քանի որ վերածնունդը, անմահությունը, եթե անգամ պատրանք-երազանք է, իմացական ինչ-որ խորհուրդ է պարունակում, դրանում ինչ-որ իմաստավորված բան կա, մինչդեռ «խղեալի, անդրատենչութենե, Աստուծոն թափուր կյանքի պետքին մեջ՝ լոկ սկզբնական անասնություն մը, կույր, բիրտ, երանավետ» (էջ 157-158): «Երբ մտածման էությանն համեմատ կյանք մը չկա բնավ, կա՛ն պետք է անասնանալ կամ մեռնիլ» (էջ 158): Մարդը պետք է որ հարություն առնի, - պետք է հավատալ դրան, հակառակ դեպքում ինչպես դիմանալ «ժողով մահվան չափազանց տառապեցնող» անազնությանը, և ինչպես խուսափել այս ցավից, և ու՞ր փախչել հետապնդող այս ցավից:

Ինտրայի «Ներաշխարհի» ես-ը, քննելով մահվան ֆենոմենը, *գիտակցաբար, ոչ կույր հավատով, խոր քանակականությամբ* մահվան գաղափարից փախուստի է պիտում դեպի անմահության հովիտ՝ Աստվածային անեզրություն: Քննվում է անմահություն-պատրանք-երազանք հարցը: Խնկի հուռը ծնում է զուգորդումներ՝ մահվան հոտ, մահը՝ նոր զուգորդում՝ բուրգերի և Մֆինքսի առեղծվածը:

Դեռ «Ներաշխարհի» առաջին գլխի քննությունից էր երևում, որ ինքնասույզ ներհայեցողը «երկնելու», «ծնելու» է ճշմարիտ «ուղի», «գառ»,

«սասնար», «դուռ»: Մահվան և սիրո, մահվան և պատրանք-երազանքի, ցավի և հաճույքի հակադրամիասնությունը, որը մենք բնորոշում ենք որպես դիոնիսյան երկփեղկվածություն¹¹, Ինտրայի «Ներաշխարհ» արձակ պոեմի կամ ecce homo-ի կոնֆլիկտի առանցքն է, կոնֆլիկտ, որ «ծավալվում» է ներաշխարհում, այնուհետև վերաճում ինքնապատերազմի, ինքնամաքառման, իսկ հանգուցալուծումը հանգեցնում է հոգևոր «հարության»՝ արևի ծագման՝ հոգու խաղաղության, քանի որ հոգու երկունքն ավարտվում է ուղի, ճանապարհ, դուռ ծնելով՝ Քրիստոսի ծննդով՝ նոր բարոյականության կամ ապարարոյապաշտության ծննդով: Ի՞նչ «դուռ» է բերում Ինտրան թանձր ցավից բխող ներքին տառապանքով:

«Ներաշխարհը» եզրափակող *վերջին երկու գլուխներն* արևելյան հեշտության սիմվոլ «քաղաքի» կյանքի նկարագիր են (արևելյան հեշտանքը, ինչպես ամեն հաճույք, որի մասին խոսվում է «Ներաշխարհ»-ում, պետք է ընկալել որպես *հոգևոր* երևույթ. Ինտրայի խոսքը երբեք մարմնականի մասին չէ):

«Ներաշխարհի» ես-ը մահվան հովտից՝ բուրգերի հովտից, վերադառնում է «քաղաք» մահից վերադառնում է կյանք: Ես-ն ապրում է մահվան զգացողության փոխակերպումը հոգու առավոտի: Ինտրայի ես-ը ապրում է մահ-հոգու վերածնունդ վերադարձի խնդությունը: «Իռենա»-սեր խորհրդանշիչը դառնում է միակ իրականությունը, ես-ը հոգու բակխանայի է ապրում և ամբողջանում որպես «տարփավորի» կյանք վայելել երազող մեկը: Իռենան դառնում է երազանքի միակ առանցքը: Ներաշխարհում սկսում են վառվել սիրո հույսի, երազանքի, անուրջների «խնկագույն», «ալեգույն», «ժողովին գույն» լույսեր: Հոգին սիրո մեջ երազում է «անհագենալի»՝ երջակնություն» և «անհագենալի ազատագրում»: Միրած էակի հոգու մեջ լուծվելու, նրան իր էությանը խառնելու, անսահման մեծ սիրո մեջ միավորվելու երազանքն արթնցնում է ես-ին, և նա ապրում է նույն տերյանական «ես էլ դու եմ, ես չկամ» հոգեբանական վիճակը: «Ներաշխարհի» ես-ը գիտե, որ սերը պատրանք է և հորինվում է սիրողի կողմից, որ այն *իր ներաշխարհի բարձր զգայականության* արձագանքն է, բայց քա՛ղցր է անուրջը. «...կսիրեմ զքեզ իբրև թե մեռած ըլլայի»։ Ես-ն իր բացառիկ հոգեկերտվածքով ընդունակ է բացառիկ՝ մահվանը համագոր սիրո: Այդպիսին են նրանք՝ վերուստ մեռակյաց օրենսդիրները՝ առ մարդը անսահման սիրուց բխած հոգու ցավից գերհասունացածները, որոնք ունեն սիրելու մեծ կարողություն: Նրանք այն մարդիկ են, ովքեր կարող են այսպես սիրել. «Հայր, ների՛ր դրանց, որովհետև չգիտեն, թե ինչ են անում» (Դուկ, Իգ, 34):

Ինտրայի «Ներաշխարհը» հրաշալի վերջաբան ունի: Հանդես են գալիս նոր սիմվոլներ՝ *երեկո*, որ գլորվում է դեպի *գիշեր*, *լուսնագիշեր*: Նույն մեծարենցյան, նույն տերյանական լուսառատ գիշերը՝ սիրո երա-

զանքով, «երկնային քրոջ» պատկերով և ինտրայական «լուսնագիշերեն հիակերտված Կույս»-ով (191 էջ):

«Ներաշխարհի» ես-ի ինքնագնմամբ Ինտրան մարդկային հոգու և նրա ապրած հասարակության ներդաշնակությունը տեսնում է նոր բարոյականության՝ ապաբարոյապաշտության մեջ՝ ինքնաբարոյան ուղին բռնած աստվածային լույսի մի հյուլե կազմող մարդու հոգուց բխող տիեզերական լույսով լեցուն կենսապաշտ առօրյայում: Մահվան ցավից գերհասունացած, կյանքի իմաստը որոնող, սիմվոլիկ սոճիների մահ-ցավ-սեր-կյանք, երկրային-երկնային, ես-Անեզր փոխանցումով մարդու ազատությունը տիեզերական անեզր սիրո մեջ որոնող հոգու երգ է Ինտրայի «Ներաշխարհը», մի երաժշտություն, որում «մարդը հանդես է գալիս բաց՝ ենթադրելով, թե մեղերու պատճառով ոչ որ չի տեսնի իրեն» (Յ. Նիցշե):

XIX դարավերջին և XX դարասկզբին հայ գրականության մեջ ծավալվող մահվան, սիրո, պատրանք-երազանքի թեման Ինտրայի «Ներաշխարհում» դրսևորված է բացառիկ գեղարվեստականությամբ:

Նախ հիշեցնենք, որ ժանրային առումով այն չափազանց պատկերավոր էսես է կամ արձակ բանաստեղծություններից հյուսված քնարական-փիլիսոփայական արձակ պոեմ: Հեղինակի տարածական մտածողությունն առարկայացել է գրական-գեղարվեստական խոշոր սիլլոգիզմներով, մտքի ճկուն զուգորդումներից ծնվող պարադոքսալ պատկերներով: Գույների (սև, մոխրագույն, կապույտ, կանաչ, խնկագույն...)՝ թանձրից լուսառատը փոխակերպումների խաղը, էլիտար մեղեդայնությունը, որ շարադրանքը ձեռք է բերում՝ շաղախվելով հոգևոր երաժշտությամբ, ադոքսներով, տվյալ պահին կոնտրաստը զուսավորող «հով», «փոթորիկ», «նոճիներ», «ծով», հոգու «գիշեր»... սիմվոլների ինքնաբոյս ներքին երաժշտականությունը, առատ ալլաբանությունները, փոխաբերությունները և պատկերավորման զանազան այլ միջոցներն ամբողջության մեջ ձևավորում են բառակերտ խորհմաստ ճարտարապետական մի վեհ կոթող (ոչ գեղեցիկ, այլ վեհ)՝ մի բուրգ, որի խորքի լաբիրինթոսում ծիփում է մահվան ցավից գերհասունացած մարդկային մտքի գիտակցության հոսքը՝ իբրև փախուստ մահվան ոչնչից դեպի ինքնամաքրագործում, ինքնաբարոյում: Այս *Esse Homo*-ն գեղարվեստական մեթոդի տեսանկյունից ևս մի նոր բարձր արժեք էր մեզանում՝ որպես սիմվոլիզմի («սիմվոլիզմը» բառի ամենախորը և ամենատևիղ իմաստով՝ որպես գիլգամեշյան¹² մեթոդի մի մետամորֆոզ) այնպիսի դրսևորում, որն, իբրև հաստատում մի ծառ, տալիս է հզոր ճյուղեր, տերևներ, պտուղներ... այսինքն՝ սիմվոլիզմն իր դիվերգենցիաներով՝ էսթետիզմ, իմպրեսիոնիզմ, գիտակցության հոսք, ապաբարոյապաշտության գրականություն, «ենթանոսական» գրական շարժում, նեոռոմանտիզմ... Ինտրայի «Ներաշխարհին» բնորոշ է այս ամենն՝ ամբողջության մեջ. մահվան և սիրո, ցավի և հաճույքի դիտնիսյան երկփեղկվածությունը

«Ներաշխարհի» սիմվոլիզմի առանցքն է, ստեղծագործության գունա-
րաժշտական ակորդների հարմոնիան այն մոտեցնում է իմպրեսիոնիզմի,
ներքին խոր դատողականությունը և ինտելեկտուալիզմը ձևավորում է գի-
տակցության հոսք, մարդու ինքնակերտումի՝ բարձր բարոյականության
ուղին՝ որպես համամարդկային փրկության ուղի (ազգային նեղ սահմա-
ներից վեր բարձրացող) ասպարառյապաշտություն է, իսկ մարդու դաս-
տիարակության նոր ուղին, «դառն», «սամսարը» գեղեցիկի մեջ տեսնելով՝
«Ներաշխարհը» ձեռք է բերում էսթետիզմին բնորոշ գծեր: Այս ամենով
իսկ «Ներաշխարհը» ողջ բարոյությամբ առանձնացավ XX դարասկզբի
հայ գրականության պատմության մեջ:

ԾԱՆՈԹԱԳՐՈՒԹՅՈՒՆՆԵՐ

1. Չրաբյան Տ., Երկեր, Ե., 1981թ., էջ 9 (Ստ. Թոփյանի առաջարանը):
2. Հանգամանքին տե՛ս Շոփինյան Մ., Լ. Շաֆի «Հին աստվածներ» դրաման, «Լա-
նան», 2002թ., էջ 56-61:
3. Ст'ю Ницше Ф., Так говорил Заратустра. К генеалогии морали. Рождение трагедии. Воля к власти. Посмертные афоризмы. Минск, 2003, էջ 898 — 902 (Воля к власти):
4. Չրաբյան Տ., Երկեր, Ե., 1981թ., էջ 56 (այս գրքից հաջորդ մեջբերումների էջերը կտրվեն տեղում):
5. Ницше Ф., Утренняя заря. Переоценка всего ценного. Веселая наука, Минск, 2003, էջ 15 (Утренняя заря):
6. Ст'ю Юнг К., Психологические типы, Минск, 1998, էջ 444:
7. Ст'ю Շոփինյան Մ., Հանճար՝ ուղի, ճանապարհ, «Բանբեր Երևանի համալսարա-
նի», 2002/2, էջ 126:
8. Ницше Ф., Утренняя заря, էջ 45:
9. Նույն տեղում, էջ 90:
10. Ст'ю Пифагор, Золотой канон. Фигуры эзотерики. М., 2004, էջ 275:
11. Ст'ю Շոփինյան Մ., Հերանոսապաշտության արձատները և XX դարասկզբի հայ
հեթանոսականությունը, «Նորք», 2005, ք.1, էջ 122-125:
12. Ст'ю Մ. Շոփինյան «Մահ-պատրանք հակադրության գեղագիտությունը «Գիլգա-
մեշ»-ում», «Գարուն», 2003/2, էջ 125-129: